



Bersama
Prof Dr Taufiq
Yap Yun Hin

Istiqamah dalam mencari Lailatulqadar

Segala puji hanya bagi Allah yang menyampaikan kita hingga fasa terakhir Ramadan pada tahun ini. Ramadan yang masih berbaki beberapa hari lagi ini memerlukan kita untuk berlari selaju mungkin dalam mengejar segala keberkatan dan kelebihan dijanjikan oleh-Nya.

Teruskan bermunajat dalam bulan Ramadan ini. "Dan apabila hamba-hamba-Ku bertanya kepadamu mengenai Aku, maka (jawablah) sesungguhnya Aku adalah dekat. Aku mengabulkan permohonan

orang yang berdoa apabila dia memohon kepada-Ku, maka hendaklah mereka itu memenuhi (segala perintah-Ku) dan hendaklah mereka beriman kepada-Ku agar mereka selalu berada dalam kebenaran." (Surah al-Baqarah, ayat 186)

Menurut Ibnu Katsir, ayat ini diletakkan selepas diterangkan hukum berpuasa adalah bagi menunjukkan anjuran memperbanyakkan doa ketika dalam bulan Ramadan, bahkan sangat-sangat digalakkan untuk berdoa setiap kali

sebelum berbuka puasa.

Sebagaimana sabda Rasulullah SAW, mafhumnya: "Tiga orang yang doanya tidak tertolak, orang berpuasa sampai dia berbuka, pemimpin adil dan doa orang dizalimi." (Riwayat Ahmad)

Pada fasa terakhir ini juga Allah memberikan tawaran sangat lumayan. Tawaran yang hanya diberikan kepada umat Nabi Muhammad SAW. Dianugerahkan kepada kita satu malam sangat mulia dan mempunyai banyak keutamaan. Kemuliaan dan kelebihan tidak

didapati pada malam lain.

Firman-Nya bermaksud: "Malam Lailatulqadar lebih baik daripada seribu bulan." (Surah al-Qadr, ayat 3)

Lailatulqadar adalah malam mulia yang sangat ditunggu orang Mukmin. Rasulullah SAW mempertingkatkan amal ibadat pada 10 hari terakhir dengan amalan yang tidak Baginda lakukan pada hari lain.

Pada fasa terakhir Ramadan ini juga Rasulullah mengurangkan hubungan dengan dunia dan beriktikaf di masjid.

"Apabila masuk 10 terakhir bulan Ramadan, maka Nabi menghidupkan malam, mengejutkan isterinya dan mengetatkan kainnya." (Riwayat al-Bukhari dan Muslim)

Pelbagai pendapat dikemukakan oleh ulama mengenai waktu Lailatulqadar sama ada berubah ataupun tetap setiap tahun, adakah ia berlaku pada malam ganjil saja dan bagaimana jika 1 Ramadan berbeza-beza? Apakah pula tanda malam yang mulia itu?

Syeikh Dr Yusuf al-Qardawi menyatakan tarikh Lailatulqadar sengaja disembunyikan oleh Allah agar umat Islam berusaha gigih untuk mencarinya.

Namun, tandanya tetap dinyatakan dalam hadis

sahih, antaranya hari esoknya tidak terlampau panas dan tidak pula sejuk serta matahari tidak memancarkan sinarnya atau pada malam ganjil dari 21 hingga 29 Ramadan.

Sekiranya kita istiqamah dalam beramal sepanjang 10 malam terakhir, pastinya kita akan bertemu dengan malam yang lebih baik daripada 83 tahun itu. Insha-Allah!

Oleh itu, pastikan kita terus memburu keampunan dan rahmat-Nya. Kesedihan pasti terasa apabila Ramadan berlalu pergi dan meninggalkan kita.

Penulis ialah Presiden Persatuan Cina Muslim Malaysia (MACMA) dan profesor di UPM.